

खबरां

1. पच्छिम बंगाल, केरल, तमिलनाडू, असम ते पुदुचेरी च होए दे विधानसभा चुनाएं दे वोटें दी गिनतरी कल होग। सुरक्षा सने लोड़चदे सब्बे इंतजाम करी लैते गेदे न।
2. चुनांस आयोग नै पच्छिम बंगाल दे दक्खन 24 परगना जिले च फाल्टा विधानसभा क्षेत्र च पूरी मतदान प्रक्रिया गी रद्द करियै 21 मई गी नमें सिरेआ मतदान करोआने दा फैसला लैता ऐ।
3. दिल्ली दे विवेक बिहार इलाके च अज्ज बड़लै मूंह न्हरे इक 4 मंजला ईमारत च अगग लग्गने दी घटना च 9 जनें दी मौत होई गई ऐ।
4. पच्छिम एशिया च जारी संघर्ष दे चलदे ओपेक प्लस मुखें जून महीने च तेल उत्पादन बंधाने पर सहमति प्रगट कीती ऐ।
5. ईरान नै संघर्ष विराम लेई अमरीका गी इक 14 सूत्री प्रस्ताव दिता ऐ। अमरीकी राष्ट्रपति डोनाल्ड ट्रम्प होरें आखेआ ऐ कि अमरीका जर्मनी च अपनी फौजी मजूदगी च कमी करग।
6. दुनिया भरै च अज्ज प्रेस दी अजादी सरबन्धी ध्याड़ा मनाया जा'रदा ऐ, भारत च बी इस मौके केई आयोजन।
7. आई.पी.एल च गुजरात टाइटन्स ते पंजाब किंग्स बश्कार मकाबला शुरू होने आहला ऐ।

<><><><><><>

Vote-Counting

पच्छिम बंगाल, केरल, तमिलनाडू, असम ते केंद्र शासित प्रदेश पुदुचेरी च होए दे विधानसभा चुनाएं दे वोटें दी गिनतरी कल होग। असम दी 126, केरल दी 140 ते पुदुचेरी दी 30 सीटें आस्तै मतदान 9 अप्रैल गी हाआ हा। तमिलनाडू दी 234 सीटें आस्तै 23 अप्रैल गी ते पच्छिम बंगाल दी 293 सीटें आस्तै 2 गेड़ें च 23 ते 29 अप्रैल गी वोट पाए गए हे।

<><><><><><>

W.B-Polling

पच्छिम बंगाल दे साउथ 24 परगना जिले दे 15 बूथें पर होए दे मतदान च 90 फीसदी लोकें वोट पाने दे अपने अधिकार दा इस्तेमाल कीता। परतिए वोट पाने आहला कम्म कुल लाई पाइयै शांतिपूर्ण ढंगै सिर सम्पन्न होई गेआ। इनें हल्कें पर परतिए मतदान करने दा आदेश चुनां आयोग नै मुतल्लका रिटर्निंग अफसरें ते निगराने आसेआ हासिल रिपोर्ट दे आधार पर दिता हा।

<><><><><><>

T.N Voting

तमिलनाडू च कल बड़लै 8 बजे थमां सारे 62 तय कीते गेदे मतगणना केंद्रें पर वोटें दी गिनतरी शुरू होग। मतगणना आस्तै कुल 10 जहार 545 कर्मिण गी तैनात कीता जाहग। इंदे सहयोग आस्तै 4 जहार 624 निगरान बी तैनात रौहंगन। स्हादे संवाददाता नै दस्सेआ ऐ जे हर इक विधानसभा क्षेत्र आस्तै इक-इक निगरान सने कुल 234 मतगणना निगरान पूरी प्रक्रिया दी निगरानी करंगन ते आयोग दे मौजूदा निर्देशों दी सख्ती कन्नै पालना करना बी यकीनी बनांगन।

<><><><><><>

SC-EC

सुप्रीम कोर्ट नै पच्छिम बंगाल विधानसभा चुनां दी मतगणना आस्तै केंद्री कर्मचारिणं दी नियुक्ति खलाफ तृणमूल कांग्रेस दी याचिका च दखल देने थमां इंकार करी दिता ऐ। न्यायमूर्ति पी.एस नरसिम्हा ते जायमाल्या बागची हुंदी विषेश पीठ नै आखेआ जे निर्वाचन आयोग गी मतगणना आस्तै कर्मिणं दी नियुक्ति करने दा पूरा अधिकार ऐ।

<><><><><><>

EC-Repolling

निर्वाचन आयोग नै पच्छिम बंगाल दे दक्खन 24 परगना जिले च फाल्टा विधानसभा क्षेत्र च पूरी मतदान प्रक्रिया रद्द करने दी असाधारण गैस पुट्टी ऐ। इस विधानसभा क्षेत्र दे सारे 285 मतदान केंद्रें पर 21 मई गी नमैं सिरेआ वोट पाए जाडन। आयोग नै दस्सेआ जे एह फैसला 29 अप्रैल गी होए दे मतदान दरान गंभीर चुनावी अपराधें ते लोकतांत्रिक प्रक्रिया दी बड़डे पैमाने पर उल्लंघना दी खबरें मगरा लैता गेआ ऐ। हुन इन्हें सारे मतदान केंद्रें पर इस महीने दी 21 तरीक गी परतियें वोट पाए जांगन। वोटें दी गिनतरी दा कम्म 24 मई गी होग।

<><><><><><>

Rijju-Opposition

संसदी मामलें दे मंत्री ते बीजेपी दे सीनियर लीडर किरें रिज्जू होरें दोष लाया ऐ जे बरोधी दल सरकारी एजेंसिणं, चुनां आयोग, इलेक्ट्रानिक वोटिंग मशीनं ते मीडिया आहलें पर हमले करै करदे न ते हून न्यायपालिका गी बी नशाना बनाया जा'रदा ऐ। इक सोशल मीडिया पोस्ट पर रिज्जू होरें आखेआ जे इन्हें दलें गी एह एहसास नेई ऐ कि ओह देश दे लोकतंत्र दी बुनियाद पर हमला करा करदे न। उन्हें आखेआ कि देश दी जनता इन्हें दलें गी ऐसा सबक सखाग जे ओह पूरी उमर नेई भुल्लडन।

<><><><><><>

Delhi-Fire

दिल्ली दे विवेक बिहार इलाके च अज्ज बड़लै मूंह न्हरे इक 4 मंजला ईमारत च अग्न लग्गने दी घटना च 9 लोकें दी मौत होई गई ऐ। अग्न दी शुरूआत ईमारत दी त्रीस मंजल पर ए.सी फट्टने कारण होई जिस कारण अग्न तेजिया कन्नै फैली गई। चैथी मंजल पर फसे दे लोक उप्पर कोठे आहली नस्से पर धूर कोठे गी जाने आहले भित्त बंद होने कारण उत्थै टकोई गे ते बुरी चाल्ली फकोने कारण उंदी मौत होई गई। एह हादसा बड़लै मूंह न्हरे साइडे त्रै बजे दा ऐ। मकामी मुंसिपल काउंसलर पंकज लूथरा होरें जानकारी थोंदे गै मौके पर जाइयै हालात दा जायजा लैता। लूथरा होरें दस्सेआ जे लोकें दियां लोथां बुरी चाल्ली फकोई दियां न ते उंदी पंछान करना मुश्कल होआ करदा ऐ। उन्हें आखेआ कि जिसलै धोड़ी डीएनए जांच नेई होई जंदी मृतकें दी शनाखत नेई कीती जाई सकदी। दिल्ली दी उपराज्यपाल तरणजीत सिंह संधू ते मुख रेखा होरें बी इस हादसे पर गैहरा दुख प्रगट कीता ऐ।

<><><><><><>

OPEC-Plus

पच्छिम एशिया च जारी संघर्ष दे चलदे ओपेक प्लस मुखें जून महीने च तेल उत्पादन बधाने पर सहमति प्रगट कीती ऐ। जानकारी मुजब 7 ओपेक प्लस मुख अगले महीने तेल उत्पादन च हर रोज करीब 1 लक्ख 88 जहार बैरल दा बाददा करने पर राजी होई गे न। भू राजनीतिक संकट ते संयुक्त अरब अमीरात दे समूह कोला बक्ख होने दे बाद एह उप्परोतली त्रिया महीना होग जिसलै

ओपेक प्लस दे देश मते तेल दा उत्पादन करंगनं अमीरात कोला बक्ख होने दे बाद ओपेक प्लस च इरान समेत हुन 21 मिम्बर रेही गेन।

<><><><><><>

Iran-14 points Plant

ईरान नै संघर्ष विराम लेई अमरीका गी इक 14 सूत्री प्रस्ताव दिता ऐ। एहदे च लेबनान समेत सब्भेनं मोर्चे पर युद्ध खत्म करने दी रूप-रेखा प्रेश कीती गेदी ऐं प्रस्ताव च इस गल्लै पर जोर दिता गेआ ऐ कि कूटनीतिक जत्नें च युद्ध विराम गी छड़ा अगड़े बधाने दे बजाय लड़ाइ गी खत्म करने दी तरजीह दिती जा। ईरान दा उपविदेशमंत्री काजेम गरीबाबादी होरें आखेआ जे हून अमरीका गी तय करना ऐ कि ओह कूटनीतिक रस्ता चुनग जां टकराव आहला। ट्रम्प होरें फिलहाल इस प्रस्ताव पर बेसंदोखी प्रगट प्रगअक् करदे होई आखेआ ऐ जे ओह एहदी समीक्षा करंगन।

<><><><><><>

NEET

अज्ज 3 मई गी भारत ते किश बाहरले मुल्खें च बी एन.ई.ई-यूजी-2026 दा मतेयान लैता गेआ जेहदे लेई कोई 22 लक्ख कोला मते विद्यार्थिएं फार्म भरे दा हा। भारत दे 551 शैहरें दे अलावा बाहरले मुल्खें च बी 14 शैहरें च एह पेपर लैता गेआ।

<><><><><><>

Germany-US Troops

अमरीकी राष्ट्रपति डानल्ड ट्रम्प होरें आखेआ ऐ जे अमरीका, जर्मनी च अपनी फौजी मजूदगी च बड़ी कमी करग। एहदे नै जर्मन चांसलर फ्रेडरिक मर्ज हुंदे कन्नै अमरीका दा विवाद होर बधी गेआ ऐ। ट्रम्प होर यूरोपी सुरक्षा दे प्रति अमरीका दी बचनबद्धता गी घट्ट करने दी कोशश करा'रदे न। पेंटागन नै शुक्रवारें पैहले घोशणा कीती ही जे ओह जर्मनी थमां तकरीबन 5 जहार सैनिकें गी वापस सददी लैग। शनिवारें इस कारवाई दी वजह पुच्छे जाने पर ट्रम्प होरें कोई सफाई जा परता नेई दिता ते आखेआ जे एहदे शा बी बड़ी कटौती होने आली ऐ।

<><><><><><>

LPG

मार्शल द्वीप समूह दे झंडे आहला एलपीजी वाहक पोत एमटी सर्व शक्ति जेदे च भारत आस्ते 46 जहार 313 मीट्रिक टन एलपीजी लदोए दा ऐ, होमुर्ज जलडमरूमध्य गी सुरक्षित ढंगै सिर पार करी गेआ ऐ। आधिकारिक सूत्रें मूजब एहदे इस म्हीने दी 13 तरीक गी विशाखापत्नम पुज्जने दी मेद ऐ। एहदे च 18 भारतीयें सने चालक दल दे 20 सदस्य बी सोआर न। पतन, पोत परिवहन ते जलमार्ग मंत्रालय नै कल इक संवाददाता सम्मेलन च आखेआ जे खिते च सारे भारती नाविक सुरक्षित न।

<><><><><><>

PM NITI Members

प्रधानमंत्री नरेंद्र मोदी होरें डॉक्टर आर. बालासुब्रहमण्यम तः डॉ. जोरम अनिया होरें गी नीति आयोग दः पूरी अवधि आलः फुल टाइम मिम्बर दः तौर पर नियुक्त कीता ऐ। सोशल मीडिया दी इक पोस्ट च प्रधानमंत्री होरें आखेआ जः उंदा समृद्ध अनुभव तः बक्ख-बक्ख मुद्दें दी गैहरी समझ नीति निर्माण गी मता मजबूत करोग। उनें विश्वास बुज्झेआ जः उंदा योगदान कन्नै सबभनें खत्तरें च नमिएं काहडें तः विकास गी रफ्तार मिलग।

<><><><><><>

Press Freedom Day

दुनिया भरै च अज्ज प्रेस दी आजादी सरबन्धी ध्याड़ा मनाया जा'रदा ऐ। एह ध्याड़ा प्रेस दी आजादी गितै पैहलकदमिएं ते जत्नें गी प्रोत्साहित ते विकसित करने दे कुल संसारी सतह पर प्रेस दी आजादी दी स्थिति दा आंकलन करने दा मौका ऐ। इस बरे इस ध्याड़े दे मौके पर दुनिया भरै च पत्रकारिता, ए.आई, सूचना प्रौद्योगिकी ते मनुखी अधिकारें दे कार्यकर्ताएं गी भविष्य लेई सूचना बवस्था गी मजबूत करने दे असरदार तरीकें पर सब्बनें गी इकजुट करने दा मौका देने पर जोर दिता जा'रदा ऐ।

<><><><><><>

World Press Day

प्रेस दी आजादी सरबन्धी अंतरराष्ट्री ध्याड़े दे मौके पर वरिष्ठ पत्रकारें आकाशवाणी समाचार जम्मू कन्नें गल्लबात दुरान लोकतंत्र च मीडिया दी महत्वपूर्ण भूमिका पर लोह पांटे होई अपने विचार सांझे कीते। एन.डी.टी.वी दे वरिष्ठ पत्रकार प्रदीप दत्ता ते पीटीआई दे सोमिल अबरोल होरें इस गल्ले पर जोर पाया जे इक आजाद, निरपेक्ष ते जिम्मेदार प्रेस, इक मजबूत लोकतांत्रिक बवस्था दी रीड हुंदी ऐ। प्रदीप दत्ता होरें आखेआ जे पत्रकारिता दा मुख मकसद सच्चाई गी सामने आहनना ते इस गल्ले गी यकीनी बनाना ऐ जे सेही जानकारी आम लोकें तगर पुज्जी सकै। जिसलै के सोमिल अबरोल होरें आखेआ जे प्रेस दी आजादी दड़ा इक अधिकार गै नेई ऐ, सगुआं इक बड़ी जिम्मेदारी बी ऐ।

<><><><><><>

IPL

आई.पी.एल च अज्ज द'ऊं मैच खेड़े जा'रदे न। पैहला मैच दिनें साइडे 3 बजे सनराइजर्स हैदराबाद ते कोलकाता नाइट राइडर्स बंशकार ते इक्क होर मैच गुजरात टाइटन्स ते पंजाब किंग्स बंशकार संझा साइडे 7 बजे शा खेड़ेआ जाहग। गुजरात नै टास जितियै पैहले गेंदबाजी करने दा फैसला लैता ऐ। दिनें आहला मैच कोलकाता दी टीम नै 7 विकेटें कन्नें जिती लैता। हैदराबाद नै पैहले बल्लेबाजी करदे होई 19 ओवरें च 165 रन बनाए जेहदे परते च कोलकाता दी टीम नै 18 ओवरें ते 2 गेंदें च 3 विकेटें दे नुकसान पर 169 रन बनाए ते मैच जिती लैता। IPL क्रिकेट च कल रातीं चेन्नई च चेन्नई सुपर किंग्स नै मुम्बई इंडियन्स गी 8 विकेटें कन्नें हराई दिता। पैहले बल्लेबाजी करदे होई मुम्बई इंडियन्स नै तय 20एं ओवरें च 7 विकेटें पर 159 रन बनाए। परते च चेन्नई नै 18 ओवरें ते 1 गेंद च 2 विकेटें दे नुकसान पर 160 रन बनाइयै मैच जिती लैता। चेन्नई दे ऋतुराज गायकवाड़ 67 रन ते कार्तिक शर्मा 54 रन बनाइयै नाबाद रेह।

<><><><><><>

LG-Padyatra

केंद्र शासित प्रदेश च जारी 100 दिनें दे नशामुक्त जम्मू-कश्मीर अभियान दे हिस्से दे तौरा पर अज्ज श्रीनगर च टी.आर.सी फुटबाल स्टेडियम च आयोजित इक्क बड़ी पदयात्रा गी उपराज्यपाल मनोज सिन्हा होरें झंडी दस्सिए खाना कीता। इस मौके पर बड़ी बद्द गिनतरी च लोक मजूद हे जेड़े ना शड़ा श्रीनगर सगुआं जम्मू-कश्मीर दे बक्ख-बक्ख हिस्सें थमां आए दे हे जिंदे अंदर केंद्र शासित प्रदेश गी पूरी चाल्ली नशामुक्त बनाने गी लेइयै बड़ा मता उत्साह दिक्खने गी बी लब्बा। इस मौके पर बोलदे होई उप राज्यपाल होरें प्रशासन दी जम्मू कश्मीर था नशें पदार्थ दी माडी कबूतू गी खतम करने प्रति बचनबद्धता फीह जाहिर कीती। उनें इस कबूतै खिलाफ सब्बनें गी इकजुट होईए कम्म करने दा आहवान कीता। उपराज्यपाल होरें आखेआ जे नशे दे कारोबारिएं ते आतंकवादिएं बंशकार संड-गंड देसै दी अंदरूनी सुरक्षा लेई खतरा ऐ।

Doda-Sec-163

डोडा दे जिला मैजिस्ट्रेट कृण लाल होरें भारती नागरिक सुरक्षा संहिता (BNSS) दी दफा 163 दे तैहत इक आधिकारिक हुकम जारी कीता ऐ जेहदे तैहत 5 जां ओदे शा मते लोकें दे इक्के थाहें पर किट्ठे होने पर पाबंदी लाई दिती ऐ। एहदा मकसद बसनीकें दी सुरक्षा गी यकीनी बनाने ते जिले च कनून बवस्था बनाई रखना ऐ। एह बंदशां बशेष तौरा पर किश प्रमुख थाहरें आस्तै लाई गेइयां न जिंदे च क्लाक टावर चैक, देसा रोड ते जेके स्पोर्ट्स स्टेडियम दे 100 मीटर दे दायरे अंदर दे इलाके शामिल न जित्थे असंगठित प्रदर्शनें दी योजना दा जिक्र अधिकारियें आसेआ कीता गेआ ऐ। उंदा आखना ऐ जे एह गैह इस करी पुट्टी गेई ऐ जे यात्रुएं गी औने-जाने च कोई परेशानी नेई होऐ।

<><><><><><>

Baglihar Dam

पिछले बरे पहलगाम च होए दे आतंकवादी हमले दे मगरा सिंधु जल संधि गी स्थगित कीते जाने दे इक बरे परैंत बी रामबन जिले च चिनाब दरेया पर बगलिहार डैम दे सब्बै गेट बंद रक्खे गेदे न। एह गैह खिते च पानी दे प्रबंधन ते पनबिजली सरबन्धी कम्म-कारवाइएं पर इस संधि दे स्थगित होने दे असर गी दर्शादी ऐ। पहलगाम आतंकी हमले दी पछोकड़ै च लैते गेदे इस फैसले दे बाद थमां गै गिलियार पनबिजली परियोजना पर नेइमी तक्क रक्खी जा'रदी ऐ। ध्यानजोग ऐ जे भारत ते पाकिस्तान बश्कार पानी दी बंड आहली सिंधु जल संधि गी पहलगाम आतंकी हमले दे बाद अगड़ा पाई दिता गेआ हा।

<><><><><><>

Weather

उत्तराखंड च मौसम नै इक बारी फही करवत बदली ऐ जेहदे चलदे राज्य दे केई हिस्सें च रुकी-रुकीयै बरखा बरा करदी ऐ ते तापमान च बी बड़ी मती कमी दर्ज कीती जा' रदी ऐ। मौसम विभाग नै औने आले किश दिनें दरान इससै चाल्ली दे हालात बने दे रौहने दी भविक्खवाणी कीती ऐ। अज्ज बड्डलै थमां गै राज्य दे बक्ख-बक्ख हिस्सें च हौली थमां दरम्याने दर्जे दी बरखा बरी ऐ। पिछले 3 दिनें थमां रुकी-रुकीयै बरा करदी बरखा करी केई हिस्सें च पारा सामान्य थमां हेठ चली गेदा ऐ। मौसम विभाग दे देहरादून केंद्र मूजब राज्य दे मते सारे हिस्सें च अज्ज ते कल बी बरखा दी मेद ऐ। विभाग नै इस अवधि दरान गरज-चमक ते तेज ब्हांs चलने दी चेतावनी बी जारी कीती ऐ। देहरादून, टेही, हरिद्वार, पौड़ी, नेनीताल, चम्पावत ते उधम सिंह नगर जिलें च ऐन गड़े ते भारी बरखा दा ओरेंज अलर्ट जिसले के होरनें इलाकें लेई येलो अलर्ट जारी कीता गेदा ऐ।

<><><><><><>